

FJALA E DEPUTETES ALBANA VOKSHI

Neni 7 i Kushtetutës sanksionon parimin e ndarjes dhe balancimit të pushteteve. Këtu merr përparësi funksioni i kontrollit parlamentar, dhe Kushtetuta, jo më kot, ka përcaktuar disa mekanizma. Kemi katër javë që kemi kërkuar (shikoje sa është dosja, ka edhe shumë tjera, zoti Braçe) dhe po kërkojmë komision hetimor. Ngrijeni komisionin hetimor, që t'i hetojë edhe ato paratë që thua ti. Le të vijë Edi Rama të japë shpjegime për çantën, për valixhet për të nisur lobimin, për ato para që ti sapo i nxore aty. Le të vijë Edi Rama, këtë po kërkojmë. Janë 13 pyetje, 2 javë me radhë të mërkurave... Nuk e lë Kushtetuta në dorën tënde, nuk e lë Kushtetuta as në dorën e Lindita Nikollës, jo. Çdo të mërkurë, 13 pyetje do t'i rrinë si çekan mbi kokë Edi Ramës dhe do të vijë t'u përgjigjet. Në qoftë se nuk do të përgjigjet këtu, do t'i përgjigjet popullit. Atje, në Amerikë, McGonigal është në burg. Edi Rama atje e ka vendin, më vjen keq. 13 pyetje çdo të mërkurë, Edi Rama do t'i ketë këtu. Për ato paratë e lobimit, që thoni ju, do të vijë Edi Rama të përgjigjet, sepse për ato ka vjedhur paratë e shëndetit. Shikojeni pak këtë foto, se ju duhet të qani, jo të qeshni! Është pediatria e Durrësit. Shikoni si rrinë fëmijët dhe prindërit në radhë me orë e orë, dhe për çfarë?! Se i vjedh paratë Edi Rama për t'ia çuar me valixhe në parkimet e restoranteve në Amerikë, McGonigal-it. Për çfarë?! Për të investiguar opozitën, për ta shpërbërë opozitën, për ta zhbërë opozitën.

Por ta harroni, zoti Braçe, sado të përpiqeni, edhe ju, zonja Nikolla, këtu do të na keni, nuk e lëshojmë ne këtë foltore. Nuk do të ketë asgjë tjetër që do të diskutohet këtu, pa u diskutuar skandali Rama-Gate, "Rama-McGonigal". Kështu që, sa herë t'i mohoni të drejtat e mia dhe të kolegëve të mi..., 27 deputetë keni përjashtuar, e keni bërë si regjim, diktaturë. Garda prek deputetin, nuk e lë të futet me urdhër të Lindita Nikollës, një grua pra... Nuk ka keqpërdorim më të madh sesa ky që u bën Rama grave. Mua më vjen keq për këto. Distancohuni, ejani me ne që ta ngremë sot komisionin hetimor dhe aty të hetohen edhe ato fotot që nxorët ju, zoti Braçe, edhe akuza të tjera, edhe aktakuza amerikane. E keni aktakuzën, le të fillojë. Po të kishte drejtësi, të ishte një Kryeministër normal, por ai nuk është normal, është frikacak, është burracak, ndaj fshihet, fshihet një herë në Surrel, pastaj fshihet pas fustanit të grave (atje do të shkojë, do të hetohet, se s'ka çfarë bën; 14 herë në një aktakuzë është përmendur emri i Edi Ramës), po të kishte SPAK, do të kishte filluar hetimi, por edhe SPAK-u nuk funksionon.

Pra, nuk ka drejtësi dhe, për aq kohë sa nuk ka drejtësi, do të jemi këtu, në këmbë, do të jemi këtu sot, do të jemi me protestuesit që ishin sot, të cilët i falënderoj, se janë qëndrestarë dhe, më shumë akoma, do të jemi në datën 3 mars, në orën 12:00, para Kryeministrisë, sepse revolucioni ka filluar. Deri në fitore, këtu do të jemi.